

Intanto il cieco narrommi la sua storia.

Mi son nato fio unico e senza difetti de un ricco venditor de' commestibili. Ho avudo anche un poco de coltura; val a dir, son sta a scola a imparar a lezer a scriver e a far conti. Da ragazzo stava insieme a mio pare in bottega o in mezzà a far pratica del mio mestier e de un poco de commercio. Gaveva sedese anni quando me ze vignude le variole (1). E per causa de queste son restà senza el bel don della luse dei occhi. Da là a poco tempo ze mancada mia mare, e dopo quattro anni anea el mio sior pare. Solo e orbo, la mia roba e le mie faccende ze restae in man de un direttor. Mi no so come che la sia stada, ma ben so che a poco a poco ho perso tutto el mio; so diventà miserabile e invece el direttor ze diventà el paron de tutto quel che giera mio. Gaveva allora vintisie anni e no savendo più come viver m' ho messo a questuar. La recordanza de quel che giera mi stà, moveva a compassion gran numero de persone, in maniera che contro la mia aspettativa vadagnava dei bezzi no pochi e viveva ben. Ma per mia disgrazia avendome mancà un ragazzo, che me conduseva in ziro e che giera onesto, m' ho dovuto metter in man de' altri. Ma costori i me magnava el più, e anea i me robava in scondon i miei risparmi. So sta allora costretto per aver una persona fidada e de cuor, de far quello che presso tanti passa per una bestialità, cioè de maridarme. E grazie al cielo go incontrà ben, avendo sposà una donna savia e piena de economia. E per mia maggior consolazion me ze nato anea un fio.

Sto mio fio ze adesso diventà grandò e grosso avendome sempre dà saggi de rispetto e de ottima condotta. Go fatto dar una bona educazion. E ella no lo crederà, ma al presente el ze drio a terminar i so studi a Padoa

(1) Il vaiuolo.